

STRATEGIJA

ZA PREVENCIJU KORUPCIJE

2017.-2019.

Januar, 2017. godina

Sadržaj

1. Uvod.....	3
2. Borba protiv korupcije – pravni okvir	4
2.1. Strategija za borbu protiv korupcije 2015.-2019. u Bosni i Hercegovini	4
2.2. Strategija za borbu protiv korupcije 2016.-2019. Federacije BiH.....	5
2.3. Zakonski okvir Ureda za reviziju institucija u Federaciji Bosne i Hercegovine.....	6
3. Opći cilj Strategije za prevenciju korupcije 2017.-2019.....	7
4. Strateški ciljevi i mjere	8
5. Rizici u provođenju Strategije za prevenciju korupcije 2017.-2019.	11
6. Način provođenja i praćenja implementacije Strategije za prevenciju korupcije 2017.-2019.....	12

1. Uvod

Korupcija predstavlja *svaku zloupotrebu moći povjerene javnom službeniku ili licu na političkom položaju na državnom, entitetskom, kantonalnom nivou, nivou Brčko distrikta Bosne i Hercegovine, gradskom ili općinskom nivou, koja može dovesti do privatne koristi.*¹

Prije nego što se počne razmatrati na koji način najefikasnije djelovati na prevenciji korupcije, potrebno je povezati taj fenomen za javnu upravu. Pojam korupcije i javnog upravljanja su usko povezani, ali se međusobno isključuju. Javno upravljanje podrazumijeva sve aspekte u upravljanju državom tj. kompetentno upravljanje javnim dobrima i aktivnostima, transparentno i odgovorno, te u skladu sa potrebama društva. Dobro upravljanje je preduslov za održivi razvoj. Gdje je loše upravljanje, tu postoje podsticaji i više prostora za korupciju. Stoga, stavljanje u prvi plan i promocija dobrog upravljanja, koja se nadopunjuje uspostavljanjem institucionalnog okvira, jačanjem vladavine prava i podizanjem svijesti, preventivno djeluje i pomaže u borbi protiv svih oblika korupcije. U suprotnom, korupcija narušava dobro upravljanje i potkopava sve segmente društva.

Uloga vrhovnih revizorskih institucija (u daljem tekstu VRI) u borbi protiv korupcije je preventivna, što je prepoznato i posebno istaknuto u Strategiji za borbu protiv korupcije 2016.-2019. Federacije BiH (u daljem tekstu Strategija FBiH). Svojim djelovanjem, VRI jačaju javne institucije - stubove nacionalnog sistema integriteta. Tako je i u ISSAI 1 – Limska deklaracija, u Prvom poglavlju navedeno:

“Koncept i uspostavljanje revizije neodvojivi su u upravljanju javnim finansijama jer upravljanje javnim sredstvima predstavlja povjerenu obavezu. Revizija nije svrha samoj sebi, već nezamjenjivi dio regulatornog sistema čiji cilj je pravovremeno otkriti odstupanja od prihvaćenih standarda i kršenja principa zakonitosti, efikasnosti, efektivnosti i ekonomičnosti finansijskog upravljanja, kako bi se omogućilo preduzimanje korektivnih radnji u pojedinim slučajevima, a odgovorne natjeralo da prihvate odgovornost kako bi se nadoknadila šteta; ili kako bi se preduzeli koraci na sprečavanju ili barem otežavanju takvih prekršaja”.

Prema ISSAI 5700 - Smjernice za reviziju prevencije korupcije, uloga VRI-a u borbi protiv korupcije treba biti višestruka, te uključuje sljedeće:

- uključivanje pitanja korupcije i zloupotrebe položaja u obavljanju poslova revizije
- podizanje javne svijesti o korupciji i zloupotrebi položaja kroz pravovremeno objavljivanje revizorskih nalaza
- poboljšanje metoda i alata za borbu protiv korupcije i drugih oblika zloupotrebe
- omogućavanje „zviždaćima“² da prijave korupciju
- saradnja sa drugim institucijama u borbi protiv korupcije.

Kada je u pitanju odgovornost revizorskih institucija u sprječavanju korupcije, treba imati u vidu da revizija treba da djeluje preventivno, ali je činjenica da su očekivanja javnosti velika. Naime, osnovni zadatak i svrha revizije, je da se putem provođenja revizije izraze nezavisna mišljenja o tome da li finansijski izvještaji sadrže značajno pogrešne prikaze, te da li su aktivnosti, transakcije i informacije,

¹ Zakon o Agenciji za prevenciju korupcije i koordinaciju borbe protiv korupcije, „Službeni glasnik BiH“, broj 103/09 i broj 58/13. U daljem tekstu: Zakon o Agenciji

² Pojam zviždać se u praksi koristi kao sinonim za engleski izraz „whistleblowing/whistleblowers“ koji podrazumijeva objelodanjivanje lošeg upravljanja, korupcije, nezakonitih radnji ili drugih nepravilnosti, javnosti ili ovlaštenim licima, koje obično čini zaposleni u organu vlasti ili privatnom preduzeću.

<http://legal-dictionary.thefreedictionary.com/Whistleblowing>

po svim bitnim pitanjima usklađene sa odgovarajućim zakonima i propisima. Revizijom se također ocjenjuje finansijsko upravljanje, funkcija interne revizije i sistemi interne kontrole³.

Kao i u dosadašnjem radu, Ured za reviziju institucija u Federaciji BiH (u daljem tekstu: Ured za reviziju) će kroz svoj rad nastaviti preventivno djelovati s ciljem osiguranja zakonitog i ispravnog funkcionisanja organa uprave i trošenja budžetskih sredstava. Također, u situacijama kada prilikom obavljanja redovnih aktivnosti iz nadležnosti Ureda za reviziju, postoje indicije o kršenju zakona koje mogu upućivati na korupciju, Ured za reviziju će pravovremeno obavijestiti nadležne organe.

Kako bi se osiguralo efikasno upravljanje prevencijom korupcije i unutar Ureda, pored donošenja Strategije za prevenciju korupcije i Akcionog plana za provođenje Strategije, osigurat će se i odgovarajuća edukacija osoblja, te podizanje svijesti o štetnim posljedicama korupcije. Ured za reviziju i na ovaj način želi da bude primjer dobre prakse u okruženju, te da doprinese efikasnijoj, transparentnijoj i efektivnijoj javnoj upravi.

Strategija za prevenciju korupcije 2017.-2019. donosi se na osnovu ISSAI 5700, obaveza proisteklih iz Strategije za borbu protiv korupcije 2016.-2019. Federacije BiH, Strateškog okvira razvoja vrhovnih institucija za reviziju 2013.-2020. godina, te Strategije razvoja za period 2017.-2020. godina Ureda za reviziju. Ista ima za cilj da putem efikasnog preventivnog djelovanja, smanji mogućnost za korupciju, te putem jačanja uticaja revizije pruži aktivan doprinos prevenciji korupcije u Federaciji BiH, te jačanju odgovornosti i transparentnosti javne administracije.

2. Borba protiv korupcije – pravni okvir

Pravni okvir za borbu protiv korupcije obuhvata zakone i strategije na nivou Bosne i Hercegovine i Federacije BiH, a koji zajedno čine okvir za poduzimanje najodlučnijih mjera s ciljem prevencije korupcije.

2.1. Strategija za borbu protiv korupcije 2015.-2019. u Bosni i Hercegovini

Na nivou Bosne i Hercegovine usvojeni su: Zakon o Agenciji za prevenciju korupcije i koordinaciju borbe protiv korupcije, Strategija za borbu protiv korupcije i Akcioni plan za njeno provođenje za period 2010.- 2015. godine, zatim Strategija za borbu protiv korupcije 2015.- 2019. i Akcioni plan za provođenje Strategije za borbu protiv korupcije 2015.- 2019.

U procesu izrade Strategije za borbu protiv korupcije 2015.- 2019., Ured za reviziju institucija u Federaciji BiH zajedno sa ostalim VRI u BiH su imali primjedbe na određene segmente ovog dokumenta koji su ugrožavali nezavisnost VRI-a, a koje Agencija nije uvrstila u konačni tekst Strategije. Obzirom da Agencija o istim nije upoznala ni Vijeće Ministara, Koordinacioni odbor vrhovnih institucija za reviziju u BiH⁴ je donio Zaključak kojim se ograđuje od sadržaja Strategije za borbu protiv korupcije 2015.-2019. godine, odnosno Akcionog plana za provođenje Strategije za borbu protiv korupcije 2015.- 2019., u dijelovima koje se odnose na VRI u Bosni i Hercegovini.⁵

³ član 13., Zakon o reviziji institucija u FBiH

⁴ Koordinacioni odbor čine generalni/glavni revizori i zamjenici generalnih/glavnih revizora Ureda za reviziju institucija Bosne i Hercegovine, Ureda za reviziju institucija u Federaciji Bosne i Hercegovine i Glavne službe za reviziju javnog sektora Republike Srpske (u daljem tekstu: KOO VRI).

⁵ 75. sjednica Koordinacijskog odbora vrhovnih institucija za reviziju, održana 31.07.2015. godine

2.2. Strategija za borbu protiv korupcije 2016.-2019. Federacije BiH

Na nivou Federacije BiH, Strategija za borbu protiv korupcije (u daljem tekstu: Strategija FBiH) i Akcioni plan⁶ za njeno provođenje doneseni su za period 2016.-2019. godine. Navedena Strategija odnosi se na kompletno društvo u Federaciji Bosne i Hercegovine kao i sve njegove institucije.

Cilj donošenja Strategije FBiH glasi:

„Vlada Federacije Bosne i Hercegovine će putem Antikorupcionog tima, a u saradnji sa Agencijom za borbu protiv korupcije, nadležnim finansijskim, inspeksijskim i pravosudnim i svim drugim organima na teritoriji Federacije BiH kao i sa kantonima i općinama, nevladinim, međunarodnim organizacijama, civilnim društvom, medijima, drugim institucijama, privrednim subjektima i drugim organizacijama koje su registrovane na području Federacije Bosne i Hercegovine, od federalnog do općinskog nivoa unaprijediti učinkovitost, transparentnost i nepristranost u donošenju odluka i postupanju.“

Strategija FBiH se zasniva na sljedećim načelima:

- **načelo zakonitosti**, podrazumijeva usklađenost zakonskih akata, kao i svih antikorupcijskih aktivnosti sa istima;
- **načelo objektivnosti**, podrazumijeva da se cjelokupan proces strateškog planiranja zasniva na objektivnim pokazateljima i da je zasnovan na činjenicama;
- **načelo javnosti**, podrazumijeva da će se osigurati transparentnost i javnost u implementaciji antikorupcijskih aktivnosti, da će Strategija biti promovisana u javnosti te da će se obavještavati o ostvarenom napretku;
- **načelo sveobuhvatnosti**, podrazumijeva uključivanje što većeg broja aktera u izradi strateških aktivnosti kako bi se stvorila koalicija u borbi protiv korupcije;
- **načelo efikasnosti**, podrazumijeva da se prilikom planiranja strateških aktivnosti vodi računa o optimalnom trošenju raspoloživih resursa.

Osnovni ciljevi Strategije FBiH, koji su razrađeni kroz strateške programe su:

- Prevencija korupcije
- Suzbijanje korupcije
- Razvijanje svijesti o štetnosti korupcije i saradnja sa građanskim društvom
- Koordinacija, monitoring i evaluacija antikorupcijskih aktivnosti.

Posebno relevantno za Ured za reviziju je strateški program 1.2.1. koji se odnosi na jačanje uloge revizije i kontrole putem specijalizacije, kadrovske popunjavanja i primjene inovativnih rješenja u vršenju poslova nadzora i kontrole. Upravo su navedeni cilj i program bili osnova za definisanje ciljeva i aktivnosti u Strategiji za prevenciju korupcije Ureda za reviziju.

⁶ „Službene novine Federacije BiH“, broj 75/16

2.3. Zakonski okvir Ureda za reviziju institucija u Federaciji Bosne i Hercegovine

Zakonski okvir Ureda za reviziju obuhvata Zakon o reviziji institucija u Federaciji BiH⁷ i ISSAI okvir u BiH⁸.

Zakon o reviziji uređuje reviziju institucija u Federaciji Bosne i Hercegovine, te ciljeve, dužnosti, organizaciju, rukovođenje i mjerodavnost Ureda za reviziju.

Po pitanju postupanja u slučaju sumnje na prevaru i drugih nepravilnosti, Ured za reviziju u skladu sa Zakonom o reviziji, Međunarodnim standardima za vrhovne revizorske institucije („ISSAI standardi“) i Međunarodnim standardima revizije („MRevS“), nema odgovornost za sprječavanje prevare, jer je to primarna odgovornost menadžmenta i onih koji su zaduženi za upravljanje⁹. Revizija provedena u skladu sa MRevS-ima oblikovana je tako da pruži razumno uvjerenje da finansijski izvještaji razmatrani kao cjelina ne sadrže značajna pogrešna prikazivanja, bilo da su uzrokovana prevarama ili greškama. Sama činjenica da je obavljena godišnja revizija može uticati na sprječavanje prevare ili greške, međutim revizor nije, niti može biti odgovoran za sprječavanje prevare ili greške. Iako revizor može sumnjati, ili u rijetkim slučajevima, otkriti nastanak prevare, revizor ne donosi pravne odluke o tome da li je prevara stvarno nastala. Kada je prikupljena informacija o zloupotrebi, revizori javnog sektora razmatraju da li takva zloupotreba može značajno uticati na finansijske izvještaje sa kvantitativnog i kvalitativnog stanovišta. Revizori javnog sektora ne izražavaju razumno uvjerenje o otkrivenoj zloupotrebi, već razmatraju potrebu da ukoliko je primjereno, izvještavaju o takvim slučajevima¹⁰. Što se tiče utvrđenih pojava neusklađenosti sa zakonima i propisima revizori javnog sektora saopštavaju o istim, u svojim izvještajima.

U skladu sa članom 19. Zakona o reviziji, Ured za reviziju dužan je, nakon što informiše rukovodioca revidirane institucije, osim ukoliko se time neće prouzrokovati uticaj na istragu, obavijestiti nadležne organe za provođenje zakona kada postoje indicije o postojanju značajnih kršenja zakona.

Na 22. INCOSAI Kongresu usvojen je novi ISSAI 5700 - Smjernica za reviziju prevencije korupcije. Navedeni standard pruža smjernice revizorima za reviziju anti-korupcijskih politika i procedura u javnom sektoru, koje se obavljaju u skladu sa nadležnostima. Smjernica 5700 također može biti od koristi VRI i subjektima revizije kao smjernica za implementaciju i provođenje sopstvenih anti-korupcijskih mjera.

ISSAI 5700 obuhvata ključne dijelove anti-korupcijskih struktura i procedura koje se mogu naći u javnim institucijama. Opisuje uspostavljanje anti-korupcijskih struktura, te pristup procjeni rizika i vršenje nadzora. Naglašava se uspostavljanje efektivne anti-korupcijske organizacije uključujući rotaciju revizora, važnost uloge internog pregleda, jačanja ljudskih resursa, pružanje obuke i podizanje svijesti o štetnim posljedicama korupcije.

⁷ „Službene novine Federacije BiH“, broj 22/06. U daljem tekstu: Zakon o reviziji

⁸ „Službene novine Federacije BiH“, broj 30/11 i 62/14. ISSAI okvir u BiH obuhvata standarde i smjernice za vrhovne revizorske institucije.

⁹ ISA 240- Revizorove odgovornosti u vezi sa prevarama u reviziji finansijskih izvještaja, paragrafi 8.-13.

¹⁰ ISSAI 1240- Odgovornosti revizora u reviziji finansijskih izvještaja u pogledu prevare, para.9.

3. Opći cilj Strategije za prevenciju korupcije 2017.-2019.

Strategijom za prevenciju korupcije 2017.-2019. (u daljem tekstu: Strategija Ureda za reviziju) se nastoji stvoriti opći okvir za efikasno i efektivno djelovanje u oblasti suprotstavljanja korupciji. Na ovaj način će se ozvaničiti i definisati uloga i cilj Ureda za reviziju u borbi protiv korupcije u FBiH, koja je preventivnog karaktera.

Na osnovu Strategije Ureda za reviziju, donijet će se mjere i aktivnosti, te izraditi operativni plan djelovanja protiv korupcije.

U vezi sa navedenim, definisan je sljedeći, opći cilj ove Strategije:

Ured za reviziju institucija u Federaciji BiH će uspostaviti efikasan sistem koji je usmjeren na prevenciju korupcije, a svojim opredjeljenjima i aktivnostima će nastojati ojačati ulogu i povjerenje u rad Ureda za reviziju, te afirmisati pozitivne vrijednosti uključujući integritet, transparentnost i odgovornost.

4. Strateški ciljevi i mjere

Iz općeg cilja, formulirana su tri strateška cilja, koja su dalje razrađena kroz strateške mjere i aktivnosti. Navedeni ciljevi su međusobno povezani, a zajedno daju osnov za ispunjenje strateškog cilja.

1. OSIGURATI FUNKCIONALNU I ORGANIZACIONU NEZAVISNOST I JAČATI FINANSIJSKU SAMOSTALNOST UREDA ZA REVIZIJU INSTITUCIJA U FBiH

Mjera 1: U cilju jačanja funkcionalne i organizacione nezavisnosti i finansijske samostalnosti, poduzeti aktivnosti da se Ured za reviziju definiše kao ustavna kategorija¹¹

- **Aktivnost 1:** Pokrenuti inicijativu prema nadležnim tijelima u Federaciji BiH da se Ured za reviziju uvrsti u Ustav Federacije BiH
- **Aktivnost 2:** Putem medijskih kanala podizati svijest i isticati važnost uvrštavanja Ureda za reviziju u Ustav Federacije BiH
- **Aktivnost 3:** Putem Koordinacionog odbora VRI u BiH, nastaviti sa strateškim naporima da se utiče na zakonodavnu i izvršnu vlast i druge interesne grupe s ciljem osiguranja funkcionalne i organizacione nezavisnosti

Mjera 2: Jačanje finansijske nezavisnosti i samostalnosti Ureda za reviziju putem uvođenja jednolinijskog budžeta koji podrazumijeva da Ured za reviziju po odobrenju traženog iznosa godišnjeg budžeta, isti samostalno raspoređuje prema potrebnim kategorijama rashoda

- **Aktivnost 1:** Putem Parlamentarne komisije odgovorne za reviziju nastaviti sa aktivnostima da se Uredu za reviziju obezbijede potrebna budžetska sredstva, i da se osigura finansijska samostalnost u skladu sa ISSAI 1 –Limska Deklaracija, ISSAI 10 Meksička deklaracija i ISSAI 11 - INTOSAI dobre smjernice i prakse vezane za nezavisnost VRI
- **Aktivnost 2:** Poduzeti aktivnosti koje imaju za cilj da Ured za reviziju ima poseban podračun u okviru Jedinstvenog računa trezora
- **Aktivnost 3:** Poduzeti aktivnosti prema organima i institucijama vlasti i javnosti u Federaciji BiH na isticanju važnosti osiguranja nezavisnosti i samostalnosti Ureda za reviziju u dijelu dosljedne primjene Zakona o reviziji institucija u FBiH (Lex specialis), a u skladu sa dobrom praksom u Evropskoj uniji

¹¹ Cilj 1 i mjere 1 i 2 proizilaze iz više izvora koji ističu važnost nezavisnosti vrhovnih revizorskih institucija, te koji predstavljaju preduslov za ostvarivanje svih drugih ciljeva i mjera. Tu su:

- *SIGMA Principi javne uprave*, Princip 15.: nezavisnost, mandat i organizacija VRI je uspostavljena i zaštićena ustavnim i zakonskim okvirom koje se i u praksi poštuju.

- *Uputnik Evropske komisije za pripremu mišljenja o zahtjevu za članstvo u EU*, poglavlje 32, pitanja 50/51/52: Da li je nezavisnost svake VRI zasnovana na Ustavu? Da li zakoni o VIR predviđaju funkcionalnu, operativnu i finansijsku nezavisnost VRI u skladu sa standardima INTOSAI-a? Da li su VRI finansijski nezavisni od izvršne vlasti?

- *Izveštaj o BiH za 2016. godinu Evropske Komisije* navodi da u pogledu ustavnog i pravnog okvira, vrhovne revizorske institucije u BiH nisu utemeljene u odgovarajućim ustavima.

-SIGMA Izveštaj o kolegijalnom pregledu VRI u BiH (2012), data ja preporuka da se pitanje javne revizije inkorporira u ustavne odredbe, čime bi se pokrilo uspostavljenje revizijskog ureda i druga fundamentalna pitanja

**2. JAČATI INSTITUCIONALNE KAPACITETE ZA EFIKASNO UPRAVLJANJE
PREVENCIJOM KORUPCIJE UNUTAR UREDA ZA REVIZIJU INSTITUCIJA U FBIH**

Mjera 1: Stvaranje adekvatne osnove za prevenciju korupcije unutar Ureda za reviziju

- Aktivnost 1: Jačanje sistema internih kontrola kroz unapređenje operativnih procedura i osiguranja dosljedne primjene istih
- Aktivnost 2: Kontinuirano vršenje nadzora od strane menadžmenta Ureda za reviziju o provođenju mjera za prevenciju korupcije

Mjera 2: Jačanje profesionalnih znanja i vještina za obavljanje revizije i detekciju korupcije prilikom obavljanja revizije

- Aktivnost 1: Kontinuirano unapređenje metodologije (procedura/alata) za prepoznavanje i prevenciju korupcije
- Aktivnost 2: Kontinuirano unapređenje cjelokupnog procesa revizije s ciljem osiguranja ujednačenog pristupa prema svim subjektima revizije, a posebno prilikom davanja mišljenja i preporuka
- Aktivnost 3: Pružanje kontinuirane obuke revizorskom osoblju u primjeni novih standarda i metodologije rada za obavljanje revizije i detekciju korupcije prilikom obavljanja revizije

Mjera 3. Efikasno upravljanje oblastima koja su podložna riziku i korupciji

- Aktivnost 1: Vršenje redovne analize i procjene rizika unutar Ureda za reviziju
- Aktivnost 2: Donošenje Plana integriteta, te implementacija mjera proisteklih iz istog
- Aktivnost 3: Osigurati da su svi zaposlenici upoznati sa zahtjevima Etičkog kodeksa, kao i mjerama za njegovo nepoštivanje
- Aktivnost 4: Pružanje kontinuirane obuke svim zaposlenicima kao i novim zaposlenicima iz oblasti borbe protiv korupcije, s ciljem podizanja svijesti o štetnim posljedicama korupcije
- Aktivnost 5: Osigurati pravovremeni protok informacija unutar i van Ureda za reviziju putem kanala koji štite kvalitet informacija u smislu pouzdanosti, integriteta i potpunosti

3. JAČATI PREVENTIVNU ULOGU UREDA ZA REVIZIJU INSTITUCIJA U FBIH U PROCESU BORBE PROTIV KORUPCIJE

Mjera 1: Osigurati aktivan doprinos Ureda za reviziju u prevenciji korupcije u Federaciji BiH


- Aktivnost 1: Kroz provođenje aktivnosti iz nadležnosti, Ured za reviziju će kontinuirano naglašavati upravljačke i moralne odgovornosti te važnost etičkog ponašanja i prevencije korupcije u javnom sektoru
- Aktivnost 2: U okviru obavljanja finansijskih revizija, Ured za reviziju će pratiti donošenje i implementaciju operativnih planova za borbu protiv korupcije
- Aktivnost 3: Prilikom planiranja tema revizija učinka, Ured za reviziju će dati prioritet temama koje su vezane za borbu protiv korupcije
- Aktivnost 4: Preuzimanje proaktivne uloge u prevenciji korupcije, što podrazumijeva podršku izradi i provođenju politika i strategija za borbu protiv korupcije u Federaciji BiH
- Aktivnost 5: Jačanje saradnje sa drugim institucijama odgovornim za prevenciju korupcije
- Aktivnost 6: Jačanje saradnje sa organima zakonodavne vlasti i pravovremeno upoznavanje sa revizorskim nalazima u cilju pravovremenog otkrivanja korupcijskih djela
- Aktivnost 7: Omogućiti „zviždačima“ bezbjedno okruženje za prijavu zloupotrebe ili korupcije u skladu sa zakonom

Mjera 2: Ojačati proaktivnu ulogu Ureda za reviziju u prevenciji korupcije tokom obavljanja revizije

- Aktivnost 1: U svim slučajevima utvrđenih nepoštivanja zakonskih propisa i ostalih važećih akata, nastaviti od subjekata revizije, putem davanja preporuka, tražiti potpunu i dosljednu primjenu istih
- Aktivnost 2: Analizirati važeću zakonsku regulativu i ukazivati na neusklađenost, nejasnoće i neprovodivost pojedinih zakonskih propisa, tražeći izmjene i dopune istih, kako bi se izbjeglo davanje različitih tumačenja
- Aktivnost 3: Obratiti pažnju i na osnovanost donošenja pojedinih akata i u slučajevima da se utvrdi da pojedini akti stvaraju situaciju koja dopušta ili podstiče korupciju, davati prijedloge i preporuke za izmjene istih, u skladu sa zahtjevima iz ISSAI 5700
- Aktivnost 4: Jačati saradnju sa Parlamentarnom komisijom odgovornom za reviziju u praćenju i osiguranju postupanja po datim preporukama iz izvještaja revizije

5. Rizici u provođenju Strategije za prevenciju korupcije 2017.-2019.

Identifikovani su sljedeći rizici u provođenju Strategije za prevenciju korupcije:



6. Način provođenja i praćenja implementacije Strategije za prevenciju korupcije 2017.-2019.

Kako bi se osigurala implementacija Strategije za prevenciju korupcije, poduzet će se sljedeće aktivnosti:

- ✓ Po donošenju Strategije, usvojit će se Akcioni plan sa sprovođenje Strategije za prevenciju korupcije sa utvrđenim rokovima, aktivnostima i linijama odgovornosti
- ✓ Pružit će se interna obuka uposlenicima Ureda za reviziju s ciljem upoznavanje sa Strategijom i Akcionim planom, i podizanja svijesti
- ✓ Odredit će se osoba/e za praćenje implementacije Akcionog plana i prikupljanje informacija unutar Ureda za reviziju
- ✓ Izradit će se periodični izvještaj o implementaciji Akcionog plana i Strategije za prevenciju korupcije, sa preporukama za poboljšanje
- ✓ Osigurat će se kontinuirana saradnja sa vanjskim akterima iz oblasti prevencije korupcije
- ✓ Ažurirat će se metodologija revizije sa novim ISSAI 5700

Broj: 01-05-32/2017

Sarajevo, 16.01.2017. godine



GENERALNI REVIZOR

Dževad Nekić, dipl.oec.